



COMISSÃO DA FUNÇÃO PÚBLICA

---



# MAI HATENE KONA-BA PROMOSAUN KARREIRA IHA FUNSAUN PÚPLIKA



[www.cfp.gov.tl](http://www.cfp.gov.tl)  
Comissão da função Pública

---

MELHOR SERVIÇO AO PÚBLICO

---

## **Mai Hatene kona-ba Promosaun Karreira iha Funsiaun Públika**

---

### **1. Saida mak promosaun?**

Promosaun nu'udar konkursu ida ho baze ba méritu, ne'ebé hala'o liuhusi sistema teste eskritu eletróniku, ne'ebé konsiste iha mudansa ba funsionáriu públiku ida husi nia grau atuál ba grau ida seluk tuir kedan ne'ebé aas, konforme rezultadu teste no pontuasaun sira seluk kona-ba kritériu no kondisaun sira ne'ebé hala'o tuir sistema klasifikasaun promosaun nian.

### **2. Oinsá mak hatene se funsionáriu públiku ida tuir teste no hetan promosaun?**

Atu hatene se funsionáriu ida hetan promosaun sei haree husi sistema klasifikasaun, hahú hosi eskala pontuasaun 0 to'o 400 no sei hetan promosaun, funsionáriu sira ne'ebé hetan valór (*pontu sira teste eskritu eletróniku + pontuasaun sira tuir kritériu no kondisaun sira mak rejista ona iha SIGAP*) aas to'o limite vaga ne'ebé aprova ona ba kada grau iha karreira.

### **3. Pontuasaun máximu hira mak funsionáriu públiku ida bele hetan iha teste eskritu eletróniku no hira mak bele hetan ho baze ba kritériu no kondisaun sira tuir dadus iha SIGAP?**

Iha teste eskritu eletróniku funsionáriu públiku ida bele hetan pontuasaun máximu to'o 180 no iha kritériu no kondisaun sira bele hetan pontu máximu to'o 220. Nune'e, klasifikasaun finál, sei soma, hanesan tuir mai:  $180+220=400$ .

### **4. Saida de'it mak sai nu'udar kritériu no kondisaun ne'ebé permite funsionáriu públiku ida hetan ona pontuasaun promosaun, tuir rejistu iha SIGAP?**

Kritériu no kondisaun hirak ne'e mak, hanesan:

- a) Pontuasaan ba nível abilitasaun akadémika;
- b) Pontuasaan ba kargu (diresaun eh xefia);
- c) Pontuasaan ba tempu no lokál ne'ebé hala'o knaar bá;
- d) Pontuasaan ba avaliasaun dezempeñu; no

- e) Pontuasaun ba formasaun profisionál sira.

**5. Instituisaun sira ne'ebé funsionáriu públiku sira integra presiza servisu hamutuk ho KFP, iha ámbitu promosaun?**

Sim. Instituisaun sira ne'e presiza kolabora ho KFP hodi kompleta eh ajusta dadus ruma funsionáriu sira-nian eh hodi rezolve kestaun seluk ruma mak presiza instituisaun sira-nia apoiu, liuliu parte rekursu umanu sira.

**6. Saida de'it mak konstitui responsabilidade diresaun eh departamentu rekursu umanu instituisaun nian, iha ámbitu promosaun?**

- a) Alista no kordena ho KFP hodi atualiza dadus iha SIGAP kona-ba funsionáriu sira mak servisu iha munisípiu no área sira (remota, muito remota no extremamente remota);
- b) Kordena ho KFP hodi atualiza dadus funsionáriu sira-nian iha SIGAP, hanesan Sertifikadu Formasaun Profisionál, diploma abilitasaun akadémika, avaliasaun dezempeñu no dokumentu relevante sira seluk ba promosaun;
- c) Mobiliza funsionáriu sira ne'ebé sai kandidatu ba promosaun atu tuir simulasau, teste eskritu eletróniku no anúnsiu rezultadu iha instituisaun.

**7. Iha ámbitu prosesu promosaun, bainhira mak rejista, atualiza, inklui dijitaliza dokumentu ruma funsionáriu sira-nian iha SIGAP?**

- a. Iha etapa ne'ebé diresaun eh departamentu rekursu umanu instituisaun nian sei halo hela kordenasaun ruma ba dadus kandidatu sira-nian;
- b. Iha faze hafoin verifikasaun no sertifikasaun kandidatura husi painel júri;
- c. Iha períodu hafoin apresiasaun rekursu ba admisaun ne'ebé presiza atu halo ajustamentu eh rejistu ruma mak nesesáriu.

**8. Kualkér funsionáriu públiku bele ka lae sai kandidatu ba teste eskritu promosaun?**

Lae. Funsionáriu Públiku ne'ebé la prenxe kualkér kondisaun, hanesan tuir-mai sei la tuir teste promosaun:

- a) Seidauk kompleta tempu mínimu ho durasaun tinan-haat (4) servisu iha grau;
- b) Hetan kualkér pena dixiplinár iha períodu tinan-tolu (3) ikus molok realiza konkursu, sura hahú lora 31 fulan-Dezembu tinan ida ikus-liu molok realiza konkursu;
- c) Rezultadu avaliasaun dezempeñu tinan ikus ki'ik liu husi "BOM";
- d) Laiha avaliasaun dezempeñu tinan ikus.

**9. Avaliasaun dezempeñu funsionáriu ida-nian husi tinan hira nian mak sei konsidera ba pontuasaun promosaun nian?**

Avaliasaun dezempeñu ordinária tinan-haat (4) ikus ne'ebé konklui ona no refere ba tinan hirak ne'ebé integralmente rejista ona iha SIGAP husi KFP mak bele konsidera hodi hetan pontuasaun iha promosaun.

**10. Oinsá avaliasaun dezempeñu funsionáriu ida nian ne'ebé molok goza lisensa ba estudu?**

Avaliasaun dezempeñu funsionáriu públiku ne'ebé molok ne'e benefisia lisensa ho vensimentu ba estudu mak avaliasaun extraordinária ne'ebé halo hafoin termina estudu.

**11. Oinsá se funsionáriu ida hetan rezultadu avaliasaun dezempeñu menus husi Bom iha tinan sira seluk, ne'ebé la'ós konsidera avaliasaun ikus iha prosesu promosaun nian?**

Iha kazu ne'e, funsionáriu refere bele elejivel ba tuir teste eskritu promosaun nian, maibé lahetan pontu ba rezultadu avaliasaun refere.

**12. Oinsá atu sura tempu mínimu servisu funsionáriu públiku ida nian iha grau?**

Funsionáriu públiku ida nia tempu mínimu servisu iha grau sei sura hahú husi promosaun ikus, karik seidauk hetan promosaun sei hahú husi tinan ne'ebé ingresa iha Funsionáriu Públiku to'o lora 31 fulan-Dezembu tinan ikus molok hala'o teste promosaun.

**13. Tansá funsionáriu sira-nia tempu servisu bainhira sei kontratadu la konsidera ba promosaun?**

Tanba tuir artigu 10.<sup>o</sup> husi Dekretu-Lei n.º 1/2018, lora 24 fulan-Janeiru no alterasaun dahuluk husi Dekretu-Lei n.º 5/2019, lora 27 fulan-Marsu, tempu mínimu permanénsia funsionáriu ida-

nian iha grau nu'udar funsionáriu públiku la'ós ajente Administrasaun Pública nein kualkér kontratu traballu seluk ruma.

**14. Funsionáriu Públiku sira ne'ebé goza lisensa sira bele tuir teste promosaun?**

Funsionáriu ne'ebé goza hela lisensa laho vensimentu eh lisensa espesial laho vensimentu, se hakarak tuir teste, aleinde kritériu sira seluk, tenki reintegra uluk ba servisu ho despaxu KFP nian molok omologa lista final kandidatura.

Funsionáriu públiku ne'ebé goza hela lisensa ho vensimentu ba estudu, sei la permite atu husu reintegrasaun ho fim atu hodi tuir teste promosaun.

**15. Oinsá impaktu husi lisensa sira mak funsionáriu ida goza ho tempu mínimu servisu iha grau?**

Lisensa espesial laho vensimentu no lisensa ho vensimentu ba estudu lahamenus tempu mínimu servisu, enkuantu lisensa laho vensimentu hamenus tempu servisu, nune'e tempu sira mak funsionáriu goza lisensa laho vensimentu sei la konsidera hodi sura ba tempu mínimu servisu iha grau.

**16. Funsionáriu Públiku ida ne'ebé iha diploma abilitasaun akadémika ne'ebé rejista no dijitaliza ona iha SIGAP sei hetan pontuasaun oinsá?**

Pontuasaun ba nivel akadémiku funsionáriu ida-nian ho diploma ne'ebé rejista no dijitaliza ona iha SIGAP sei hetan, hanesan iha tabela tuir mai:

<b>Grau Abilitasaun Akadémika</b>	<b>Pontu</b>
Escola Secundária ou Pós-Secundária (diploma um & dois)	5
Bacharelato (diploma três & quatro)	10
Licenciatura e Pós-Graduação	15
Mestrado	20
Doutoramento	30

**17. Diploma Abilitasaun Akadémika funsionáriu ida nian ne'ebé ahi-han eh lakon bele ka lae hetan pontuasaun iha promosaun?**

Diploma Abilitasaun Akadémika ahi-han eh lakon bele de'it hetan pontuasaun ba promosaun bainhira hetan justifikasaun husi kualkér ida husi entidade eh instituisaun hirak tuir mai, molok tinan-2008:

- a) Deklarasaun husi superintendente edukasaun nian;
- b) Instituisaun ne'ebé kompetente ba área edukasaun nian;
- c) Instituisaun akadémika ne'ebé funsionáriu hala'o estudu; eh
- d) Instituisaun ne'ebé responsabiliza ba legalizasaun diploma abilitasaun literária.

**18. Sertifikadu formasaun profesionál ida ne'ebé mak konsidera hodi atribui pontuasaun ba kandidatu ida iha promosaun?**

Tuir regra sertifikadu formasaun hotu ne'ebé iha oras no data inísiu no términu (termina) konsidera ba promosaun, ho exesaun ba sertifikadu apresiasaun, louvór eh agradesimentu, nune'e mós sertifikadu formasaun sira ne'ebé laiha data inísiu no termina.

**19. Oinsá atu sura pontuasaun ba sertifikadu formasaun sira mak rejista de'it data inísiu no termina?**

Formasaun kada loron sei sura ba oras-ualu (8), nune'e se funsionáriu ida tuir formasaun loron-rua (2), sei sura ho forma:  $(8+8=16$  eh  $8 \times 2=16$  no susesivamente)

**20. Funsionáriu sira mak partisipa iha diseminasaun lei eh regulamentu ruma husi KFP sei konsidera mós ka lae atu hetan pontuasaun ba promosaun?**

Sim. Pontuasaun ba diseminasaun lei eh regulamentu sira funsionáriu sira sei hetan tuir durasaun loron ne'ebé partisipa.

**21. Oinsá ho funsionáriu sira mak tuir indusaun?**

Funsionáriu sira ne'ebé partisipa iha asaun sira orientasaun no indusaun nian sei hetan mós pontuasaun ba prosesu promosaun nian, naran katak asaun sira ne'e akontese iha períodu ne'ebé konsidera ba promosaun nian.

**22. Tansá mak funsionáriu públiku ida ne'ebé iha sertifikadu formasaun barak rejista no dijitaliza ona iha SIGAP, maibé hetan de'it pontuasaun husi sertifikadu rua (2)?**

Tamba tuir n.º 2 artígu 15.º husi Dekretu-Lei n.º 1/2018, loron 24 fulan-Janeiru no alterasaun dahuluk husi Dekretu-Lei n.º 5/2019, loron 27 fulan-Marsu, iha kada períodu ne'ebé konsidera

ba promosaun admite de'it sertifikadu formasaun profisionál to'o rua (2) ba kada kandidatu promosaun nian.

**23. Funسیونáriu públiku ida mak servisu iha munisípiu Díli eh iha munisípiu sira seluk bele ka lae hetan pontuasaun?**

Sim. Funسیونáriu ne'ebé servisu iha munisípiu Díli eh iha munisípiu sira seluk ho durasaun ne'ebé determina ona sei hetan pontuasaun, maibé tenki iha dokumentu ruma mak komprova, hanesan despaxu husi KFP eh kualkér dokumentu seluk ruma husi superiór instituisaun nian.

**24. Oinsá atu sura pontuasaun ba funسیونáriu sira ne'ebé tinan balu servisu iha munisípiu Díli no tinan balu seluk servisu iha munisípiu sira seluk?**

Funسیونáriu Públiku ida ne'ebé tinan balu servisu iha munisípiu Díli no seluk iha munisípiu sira seluk, sei sura tempu servisu bazeia ba fórmula tuir mai:

Tempo e Lugar do Exercício de Funções		Equivalência	Pontos	Total
Díli	Município			
2Anos	3 Anos	5 Anos Município	5	5
3 Anos	3 Anos	6 Anos Díli	10	10
4 Anos	3 Anos	7 Anos Díli	10	10
4 Anos	4 Anos	8 Anos Díli	10	10
4 Anos	5 Anos	9 Anos Díli	10	10
5 Anos	4 Anos	9 Anos Díli	10	10
5 Anos	5 Anos	10 Anos Díli	10	10
6 Anos	5 Anos	11 Anos Díli	20	20
5 Anos	6 Anos	11 Anos Díli	20	20
7 Anos	7 Anos	7(dili)+7(município)	10+15	25
8 Anos	7 Anos	8(dili)+7(município)	10+15	25

**25. Funsionáriu ida ne'ebé servisu iha área sira remota (R), muito remota (MR) eh extremamente remota (ER) sei hetan ka lae pontuasaun, se hetan karik oinsá?**

Sim. Funsionáriu ne'ebé servisu iha área sira ne'e sei hetan pontuasaun, hanesan tuir mai:

Tinan sira servisu efektivu iha grau	Servisu iha área		
	R	MR	ER
5	5	10	15
6-10	15	20	25
11-15	25	30	35
Liu husi 15	35	40	45

**26. Funsionáriu ida ne'ebé iha esperiéncia asumi kargu eh asumi hela kargu sei hetan ka lae pontuasaun ba promosaun?**

Sim. Durante período ne'ebé konsidera ba promosaun se funsináriu ida asumi kargu direasaun ho durasaun tinan-rua (2) eh liu sei atribui pontu sanulu (10) no se kargu ne'ebé asumi nu'udar xefia, sei atribui pontu-lima (5), naran katak iha desizaun nomeasaun eh omologasaun husi KFP.

**27. Funsionáriu ida ne'ebé iha esperiéncia asumi kargu direasaun tinan-ida (1) de'it no asumi mós kargu xefia tinan-ida (1) bele ka lae hetan pontuasaun ba promosaun?**

Sim. Iha situasaun ne'e, maski kargu sira ne'ebé funsionáriu refere asumi, nein ida mak to'o tinan-rua (2), tuir regra, sei soma hamutuk hanesan tinan-rua asumi kargu (diresaun & xefia) no sei atribui pontu korresponde ho xefia.

**28. Oinsá ho esperiéncia asumi kargu ho forma intercalado (la tuituir malu), hetan ka lae pontuasaun ba promosaun?**

Funsionáriu Públiku ne'ebé asumi kargu direasaun eh xefia durante período ne'ebé konsidera ba promosaun, maski ho forma la tuituir malu, ho durasaun tinan-rua eh liu, sei permite atu hetan pontuasaun, naran katak iha desizaun nomeasaun nian.

**29. Oinsá atribuisaun pontu ba rezultadu Avaliasaun Dezempeñu tuir kategoria/mensaun ne'ebé funsionáriu ida hetan?**

Funsionáriu ne'ebé hetan rezultadu iha kada avaliasaun dezempeñu ho mensaun Muito Bom sei hetan pontu:10 no Bom sei hetan pontu:5.



**30. Sá mak akontese bainhira iha rezultadu final kandidatu na'in rua hetan pontu hanesan?**

Se iha rezultadu kandidatu rua mak hetan pontu hanesan, preferensia sei fó bazeia ba orden hirak tuir mai:

- b) **Feto ho mane:** kandidatu feto mak sei admite;
- c) **Antiguidade iha grau:** kandidatu ne'ebé antigu liu iha grau mak admite;
- d) **Antiguidade iha Funsauun Públika:** kandidatu ne'ebé antigu liu iha Funsauun Públika mak admite;
- e) **Idade kandidatu sira:** kandidatu ne'ebé idade liu mak sei admite.

**31. Oinsá ba funsionáriu ida mak hetan desizaun pena dixiplinár, iha loron ne'ebé KFP fó-sai rezultadu promosaun nian, iha ne'ebé nia mós sai promovidu?**

Iha situasaun ne'e, sei esklui nia husi rezultadu admisaun, ho exesaun se nia hetan pena iha loron ida tuir fali loron publikasaun rezultadu.

**Referénsia sira:**

- ✓ Dekretu-Lei n.º 1/2018, loron 24 fulan-Janeiru no alterasaun dahuluk husi Dekretu-Lei n.º 5/2019, loron 27 fulan-Marsu (Rejime Promosaun Pesoál iha Karreira sira Administrasaun Públika);
- ✓ Orientasaun n.º 24/KFP/2020, ne'ebé aprova atualizasaun regra interpretativa sira ba prosesu promosaun pesoál karreira iha Administrasaun Públika;
- ✓ Orientasaun n.º 20/2018, loron 17 fulan-Maiu, Kitériu Dezempate iha Promosaun Pesoál iha Funsauun Públika



COMISSÃO DA FUNÇÃO PÚBLICA